

Mchague Kristo Wewe Mwenyewe,

Chagueni hivi leo mtakayemtumikia. Yoshua 24:15.

Ili kutekeleza wokovu wa mwanadamu, Mungu anatumia mawakala mbalimbali. Anazungumza nao kupitia Neno Lake na watumishi Wake na kwa kupitia Roho Mtakatifu anatumia jumbe za maonyo, urejeshaji na maelekezo. Njia hizi zimeundwa ili kuangazia uelewa wa watu, kuwaonesha wajibu wao na dhambi zao, baraka wanazoweza kupipata; kuamsha ndani yao hisia za hitaji la kiroho, ili waweze kumwendea Kristo na kupata Kwake neema wanayoihitaji. Lakini wengi huchagua kuzifuata njia zao badala ya njia ya Mungu. Hawajapatanishwa na Mungu na kamwe haitakuwa hivyo, hadi pale nafsi itakaposulubiwa na Kristo kuishi moyoni mwake kwa njia ya imani.

Kila mmoja, kwa matendo yake, ama atamweka Kristo kando kwa kukataa kuwa na nia(roho) Yake na kufuata mfano Wake au kuingia katika umoja na Kristo kwa kujikana nafsi, kwa imani na kwa utii. Kila mmoja wetu anapaswa kumchagua Kristo yeye mwenyewe kwa sababu Yeye alituchagua kwanza. Umoja huu na Kristo unatakiwa kuundwa na wale ambao kiasilia wana uadui Naye. Ni uhusiano wa kumtegemea kikamilifu unaopaswa kuingiwa na moyo wenye kiburi. Hii ni kazi ya ndani sana, na wengi wanaodai kuwa wafuasi wa Kristo hawaelewi chochote juu yae. Wanamkiri Mwokozi kwa maneno tu lakini si kama mtawala pekee wa miyo yao.

Wengine huhisi hitaji lao la upatanisho na kwa kulitambua hitaji hilo na tamanio lao la badiliko la moyoni, pambano linaanza. Kuachilia yale wayapendayo, labda vitu vinavyowaletea furaha, kunahitaji kufanya bidii, ambapo wengi husita sita na kugugumia na kurudi nyuma. Lakini hii vita lazima ipigwane na kila moyo ulioongoka hasa. Tunapaswa kupambana na majaribu yatokayo ndani na nje. Lazima tupate ushindi dhidi ya nafsi zetu, tuyasulubishe mapenzi na shauku zetu; kisha tuanzishe umoja wa nafsi na Kristo. Kama tawi lililokauka na lisilo na uhai linavyopandikizwa ndani ya mti ulio hai, ndivyo tutakavyokuwa tawi lililo hai la Mzabibu wa Kweli. Na tunda lililozaliwa na Kristo litazaliwa na wafuasi Wake wote pia. Baada ya umoja huu kuundwa, unaweza kudumishwa tu kwa juhudi za kudumu, bidii na uangalifu wa hali ya juu. Kristo anatumia nguvu Zake kulinda na kuhifadhi muungano huu mtakatifu na mdhambi na mtegemezi ambaye ni dhaifu lazima afanye sehemu yake kwa bidii bila kuchoka...

Kila Mkristo anapaswa kusimama kwa tahadhari kila wakati, akitazama mahali popote moyoni mwake ambapo Shetani anaweza kupata nafasi ya kuingilia. Anapaswa kuomba msaada wa kimbingu na wakati huo huo kuwa thabiti kukinzana na kila mwelekeo wa dhambi. Kwa ujasiri, imani na jitihada zenye uvumilivu anaweza kushinda. Lakini akumbuke kwamba ili kuupata ushindi Kristo lazima akae ndani yake na yeye ndani ya Kristo... Ni kwa njia ya kuwa na umoja na Kristo pekee na kufanya ushirika Naye kila siku na kila saa ndipo tutaweza kuzaa matunda ya Roho Mtakatifu (**Testimonies for the Church 5:46-48**)